

Date – 15/06/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

- Hortoki leh Sairang inkar rel kawng him leh him loh endikna report thuneitute hnenah thehluh a ni tawh.
- Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh zinmite hip kawngah ruahmanna engemaw zat siam mek a ni.
- Ahmedabad-a thlawhna chesuala thite ruang, DNA sample atanga finfiah hna thawh mekah ruang 32 chu tute nge an ni tih finfiah a ni tawh.
- Manipur-ah Covid-19 hri kai mi 3 hmuh belh a ni.

<><><>

RAILWAYS

Hortoki leh Sairang inkar rel kawng him leh him loh endikna report chu thuneitute hnenah thehluh a ni tawh.

Rel tlanna atana rel kawng a him leh him loh endiktu Commissioner of Railway Safety (CRS) Northeast Frontier Circle Pu Sumeet Singhal chuan Hortoki leh Sairang/Sihhmui rel chawlhmun inkara rel kawng siam thar him leh him loh a endikna report chu tun hnai khan Ministry of Railways-ah a thehlut a, Ministry of Railways pawmpuina nghah mek a ni. Northeast Frontier Railway (NFR) thupuangtu Chief Public Relations Officer (CPRO) Pu Kapinjal Kishore Sharma-a'n Akashvani Aizawl a hrih danin June ni 6 leh ni 10 inkar (ni 5 chhung) khan CSR Pu Sumeet Singhal hian Hortoki leh Sairang rel chawlhmun inkar a rel kawng siam thar hi a him tawh leh tawh loh a endik a. A endikna report hi a endik hna zawh fel tuk Nilaini (June ni 11) khan Ministry of Railways-ah a thehlut a. Report hi pawm thuai a nih an beisei thu Pu Sharma chuan a sawi a. Pawm a nih hnuah chuan rel hi Bairabi atangin Aizawl khawpui daifem Sairang/Sihhmui rel chawlhmun thlengin a lo lut tawh dawn a ni.

He tianga rel kawng siam thar a him tih finfiah a nih a, rel a tlan hnu chuan June thla chhung a nih loh pawhin July thla hi chuan hawn a ni tawh dawn niin NFR thuneitute chuan an sawi a. Prime Minister emaw Railways Minister-in emaw hawng tura ngaih a ni.

Nikum July thla chawhnu lam khan CSR Pu Sumeet Singhal tho hian Bairabi leh Hortoki inkar rel kawng siam zawh hlim a him leh him loh a lo endik tawh a. Nikum vek August thla bul lam khan a him tawh tih report a thehluh chu Ministry of

Railways ina lo pawmpui tawh a. Hortoki leh Sairang inkar rel kawng siam hna hi Sairang bula lei dawh lai a chim avangin a khaw tlai ta a. Tun thla-ah endik leh theihin an peih ta chauh a ni.

Bairabi leh Sairang inkar rel kawng hi kilometre 51.38 a thui a ni a, mihring leh bungraw phur rel Mizoram a lut hian state sum leh pai dinhmun mai bakah mihring leh bungraw kal kual vel ti danglam dawrh tura ngaih a ni. Northeast Frontier Railway siam Bairabi–Sairang rel kawng thar hi,hmun 4-ah then niin, Bairabi leh Hortoki rel chawlhmun inkar km 16.72 a thui, Hortoki leh Kawnpui inkar km 9.71 a thui, Kawnpui leh Mualkhang inkar km 12.11 a thui leh Mualkhang leh Sairang inkar km 12.84 a thui a ni a. Leiverh 48, lei (bridge) lian 55, lei te 87, Road Over Bridge 5 leh Road Under Bridge 6 a awm bawk a ni.

He tih lai hian nimin khan Sairang VC Gram Sabha hun hmanna-ah Mizorama Rel lo lut hnai mai tur avangin, mipui mimir ten fimkhurna chang hriat tawh loh avanga Rel kawnga chetsualna a thlen loh na’n rel kawng himna chungchang inzirtirna 'Railway Safety Awareness Campaign' neih a ni a. He Awareness campaign-ah SDC Pu Samuel Malsawmzuala, Sairang Police station OC Pu Lalngaihawma, Asstt. Executive Engineer NF Railway Aizawl Pu Partha Pratima Das leh Sr. Section Engineer, NFR Aizawl Pu Ganesh Langthasa te’n Sairang mipui te hnenah mipui himna atana hriattur pawimawh te an zirtir a ni.

<><><>

RELIEF SUNDAY

Vawiin June ni 15 hi Mizoram Baptist Kohhran ni pawimawh “Relief Sunday” a ni a, tualchhung Kohhran tinah hman a ni.

Kumin chhawmdawlina ni, ‘Relief Sunday’ thupui chu “Pathian lawmtlak inthawina’ tih a ni a. Relief Sunday-ah hian chawhma inkhawmah Headquarters leh Tualchung Kohhran Relief rawngbawlina chanchin report leh thupui thlan sa hmangin thuchah ngaihthlak a ni a. Tun hnai ruahsur leh thli tlehin Mizoram hmun hrang hrangah chhiatna namen lo tuartute hnen a, Baptist kohhranin tanpuina an pek chhuah tawh zawng zawng chu chhungkaw 60 hnenah cheng nuai 3, sing 8 leh sang 9 a ni a. Bialtu Pastor kaltlang leh hnathawkte’n a hmunah kalin an pe thin a ni. Remchan dan leh an mamawh a zirin Silpouline te pein an sem chhuak thin bawh.

Kum 1966-1968 lai vel khan Mizoramin hun khirh tak tak a tawh chho va, chumi hnuah Baptist Kohhran chuan mipui mangangte tanpuina tur thawhlawm (Relief Fund) a bika siam tha a ti a, chhawmdawlina rawngbawlina hi Kohhrante thinlungah tuh thar zela, uar deuh deuh a lo nih theih na’n kumtin hman a ni ta a ni.

<><><>

11 YEARS OF PM MODI’S GOVT. (TOURISM)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh zinmite hip kawngah ruahmanna engemaw zat siam mek a ni.

Tourism director Pi R. Lalrodingi’n Akashvani Aizawl a hrilh danin Prime Minister Narendra Modi kaihhruai NDA sorkar hian tun hnai khan zinmite Mizoram a hip theihna tur kawng chi khat atan Unity Mall (Ekta Mall) buatsaih a nih thu a sawi a. Aizawl Chawnpui vengaw Printing & Stationery ramah Unity Mall hi sak tura ruahman a ni a, hemi atan hian sorkar laipui chuan cheng vaibelchhe 127 hmuh a ni tawh tih sawiin, ruahmanna kalpui mek a ni, a ti. Hei bakah hian zinmite hip pawimawhna inzirtir a tul hle ni a hriat a ni a, hei pawh hi kalpui tan mek a ni, a ti.

Sorkar laipui ruahmanna hnuai-ah tho hian Jan Dhan hmanga sum leh pai a mipui huapa thil kalpui hna (financial inclusion) pawh chak takin Mizoramah kalpui a ni a. He ruahmanna hnuai-ah hian bank account nuai 4 hawn a ni tawh a, an zinga a tam zawk, za zela 53 chu hmeichhia an ni. PM Mudra Yojana hnuaiah pawh cheng vaibelchhe 2,635 ruahmanin tlangmi leh hnam hnufual leh hmeichhia nuai 1, sing 5 leh sang 8-te chu kawngkama an sumdawn theihna tur ruahmansak an ni bawh a ni.



POWER THEFT

Power & Electricity department hnathawkte chuan metre box kal tlang lova electric pawt chhungkaw engemaw zat an hmuchhuak.

Power & electricity department hian kar kalta Thawhtanni (June ni 9) atang khan electric pawttute endik hna hi an kalpui tan a. Metre box kal tlang lo leh eng chhit man chawi lova electric pawt ru engemaw zat an hmuhchhuah bakah eng an neih reng theihna atana veng dang electric lo pawt kawp an hmuchhuak nual bawh. He tiang hi dan kalh a nih avangin endik hna hi an chhunzawm zel dawn tih Power & Electricity department hotute chuan an sawi a. Electric hman man chhun luh a tlem phah bakah electric pek chhuah lamah harsatna nasa tak siam thei a nih avangin man chawi lova electric pawt ru leh metre box kaltlang lova lo hmangte zawnhhuah zel an tum thu an sawi a. Tunah hian kawlphehtha pawh ruk chungchang hi endik chhunzawm zel a la nih avangin metre box kaltlang lova pawtru leh dan bawhchhetu dangte hi a zat chiah an la hriat theih rih loh thu Power department hotute chuan an sawi a ni.

Veng dang power line lo pawt kawp zingah an kawlphehtha hman man zep then an awm lai-in zep then loh pawhin a hlauhawm hrim hrim ni-in an sawi a. Engemaw palhah kangmei hial pawh chhuak thei a nih thu an sawi.



MUHCS

Mizoram Universal Health Care Scheme bultan atanga thla 2 hnuah inziak lut an la tam lo hle a, June ni 6 thlenga chhinchhiah danin MUHCS-a inziak lut hi chhungkua 5,159 an ni.

Mizoram Health Care Society chhinchhiah danin kumin April ni 1 atanga bultan Mizoram Universal Health Care Scheme (MUHCS)-ah hian chhungkaw 5,159 chiah inziak lut an awm a. Sorkar thuchhuah tarlan danin online leh offline inziah luh hi June thla chhung hawn tur niin hemi chhunga inziak lut hman lo tan August thla-ah late fee chawiin a inziah luh leh theih dawn a ni. Sorkar thuneitute tarlan danin tun dinhmunah MUHCS hmang tangkai mi 8,245 an awm tawh a, heng zingah hian damlo 655 te chu phai lama refer an ni a, June ni 6 thlenga chhinchhiah danin MUHCS hnuaia damdawiin inziak lutte hian sawrkarah cheng vaibelchhe 9 sing 2 sang 4 an hmu let tawh a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



AHMEDABAD PLANE CRASH DNA SAMPLES

Gujarat state khawpui, Ahmedabad-a thlawhna chesuala thite ruang, DNA sample atanga finfiah hna, ngawrh taka thawh chhunzawm zel a ni a, tun thlengin ruang 32 chu tute nge an ni tih finfiah a ni tawh a, heng zinga ruang 14 chu an chhungte hnenah hlan an ni tawh a ni.

Ahmedabad Civil Hospital Addl. Supdt. Dr. Rajnish Patel-a’n a sawi danin, finfiah tawh ruang 14 zinga 4 chu Ahmedabad a mi an ni a, Vadodara mi 1, Kheda, Aravalli, Botad leh Udaipur mi pakhat theuh leh Mehsana mi 4 an ni.

DNA atanga hriat chhuah tawh zingah hian Chief Minister hlui, Vijay Rupani-a ruang pawh a tel a, state Home Minister Harsh Sanghvi-a sawi danin DNA sample leh Vijay Rupani-a ruang hi a inmil tih vawiin chawhma dar 11-ah khan puan a ni.

Hetih lai hian Uttarakhand-a Gaurikund Khark tlang rama tukina helicopter chesualah mi chuang 7-te an thi vek a, helicopter-ah hian a khalhtu bakah sakhaw thila Kedarnath tlawhtu mi 7 an chuang a ni. District Tourism Officer sawi danin, chetsualna thlen chhan hi khaw chhiat vang a ni a, helicopter hian thingkung su-in a tla zui a ni.

MANIPUR COVID

Manipur-ah Covid-19 hri kai mi 3 an awm belh a, heng nen hian hri kai mi 8 hmuh chhuah a ni tawh a ni. Manipur Directorate of Health Services sawi danin nimina sample 15 endikah hri kai 3 hmuhchhuah a ni a, hri kaite hi Imphal East Dist atangin 2 leh Imphal West dist mi 1 an ni.

Tun thla ni 8 atang khan hri kai leh kai lo sample 51 endik a ni tawh a, za zelah 20-in hri an kai tih hmuhchhuah a ni.